




Literatura den Bon Dia

Ernesto E. Rosenstand



TUR COS A KEDA ATRAS

Bai bandona tur loke tabata trece recuerdonan di dlanan felis. Esei no ta nada facil. Dlanan cu tabata parce siglonan y momentonan felis cu tabata parce cu lo dura eternidad. Den bida di hende eternidad ta poco, E ta poco mas cu nada.

Y kico nada ta si no ta e conhunto di tur nos ideanan, nos pensamentonan, nos plannan, nos ilusionnan, nos emocionnan, nos sufrimento. Tur esaki ta nada y eternidad ta un poco mas cu esaki. Principalmente ora nos no kier acept'e.

E no a keda mira rond mucho, pura pura el a sali drenta den auto di Juan y nan a bai aeropuerto. Su wowonan carga tabata muestra resultado di su lucha interno. Na caminda Juan tabata un y tur calma.

E no tabata muestra ningun sorto di nerviosismo. No por a compronde den kico e tabata pensa. E tabata sinti cu e tabata haci loke su curason tabata bis'e. Y esei e tabata haya cu tabata importante.

- Y ken por contra deseo di curason?

Carmen tabata poco reserva. E no a papia nada na caminda pa aeropuerto. Y Juan a respeta e silencio aki. P'esei mes e no a cuminsa un combersacion.

Asina nan a yega aeropuerto Juan a check-in y a drenta mesora. Nan tabatin pura. Nan no kier a keda afo coriendo e riesgo pa algun hende mira nan. Y di e manera aki dañan tur nan plannan. Bo no sa nunca.

Nan tabatin miedo cu algun hende reconoce nan y stroba nan di realisa nan plan. Te na e momentonan ei tur cos a bai manera nan a pensa. Y a spera cu nada dañan nan plan. Nan a bai p'aden. Nan a bai sinta leu for di otro spera yamada pa nan barca.

Den avion nan lo sinti nan mes sigur. Y berdad no a tarda mucho cu nan a yama pa aborda, ya cu salida pa Barraquilla lo bait a den algun minuut. Ora nan a tende esaki tabata un gran alivio pa nan.

26

Ora Jacinto a yega di trabou merdia el a haya e carta bunita poni riba radio. Un luga unda sigur sigur Jacinto lo a hay'e asina e yega cas. E por a pone otro caminda unda cu e lo no tabata sigur cu Jacinto lo hay'e di e lihe ei. Ma esei e no a haci, e tabata kier pa e hay'e lo mas lihe posibel.

Carmen tabata sa cu prome cos cu Jacinto tabata haci ora e yega cas ta dun'e un sunchi y pone noticianan. Ceremoniosamente tabata haci esei tur dia cu e tabata bin di trabou. E tabata kier keda al tanto di loke tabata pasa na mundo. Y p'esei asina e yega cas e tabata pone noticianan. Tabata algo cu cercemoniosamente tabata haci tur dia.

Y berdad asina Jacinto a drenta cas el a busk'e

pa sunchi y no a hay'e. El a haya e cos aki straño. Nada tabata muestra cu Carmen tabata na cas. Y e no a bis'e cu lo e bai sali. Loke semper tabata su custumber. Y e no tabatin custumber di sali na e oranan aki.

Na e oranan aki semper e tabata hay'e na cas. E no a pensa nada malo. Djis lo e parece. Sin sa ki haci. Maske e no por a imagina unda e por tabata. Tabata loke el a kere. El a bai automaticamente na e radio, cende y ei riba el a haya e carta.

E no tabata sa ki e tabata mira. Ma el a sinti algo straño. Algo cu tabata bis'e cu algo grave mester a pasa. Y lo straño tabata cu e no a yam'e pa particip'e.

Ora el a mir'e el a sinti su curpa sacudi. Poco poco el a habrie, e tabata sa cu nada lo bai ta positivo. Un presentimento enorme a podera di dje. Su mannan a cuminsa soda friu. Y ora cu el a les'e el a kere cu lo e ta bai muri. Un sensacion nunca experiencia a podera di dje.

Su curpa a dal dos tres sacudi y el a keda paralisa. Pa un momento e no tabata sa ki haci. Su dilanti a bira scur scur. Tabata parce cu flur a bai lague y el a cai den un profundidad enorme. Un abismo scur y sin salida.

Asina el a keda pa basta rato. Sin sa ki haci. El a perde sentido di bida. Y su prome reaccion tabata: Con por ta posibel?

Poco despues el a sinta riba un stul cu su cabes den su mannan. E tabata pa desespera. Tabata parce manera cu su curpa a perde tur su energia. Tabata manera su curpa tabata zweef den esferanan desconoci. E tabatin miedo cu su pianan lo bai faya. No su pianan so, ma henter su curpa.

Radio tabata duna noticia keto bai. Nan tabata noticianan di otro galacticanan. Nan no tabata bis'e net nada. Drenta pa un horeya sali pa e otro. Den tur e tormento di su alma e tabata tende leunan ya cu president Johnson a manda solda Santo Domingo pa stop e revolucion.

Na e momentonan ei tur esaki no tabata port'e un pito. Y cu avionnan Mericano tabata bombardeando Vietnam. Ora el a tende palabra avion el a bula lanta bai telefon y a yama aeropuerto puntra ki ora tin avion pa Colombia.

El a kere cu lo e por a oponer fin na e profundo dolor cu e tabata sufriendo. Ma e no a logra. Nan a bis'e cu esun di e dia ei a caba di sali. Ora el a tende esaki su mannan sin forza a pone e telefon abou.

Mundo a zink bou su pia. Su delaster speransa a cai na awa. Maske no tabata tin sentido purba recupera loke el a caba di perde. Tabata manera su rosea a caba. Su mundo a bin abou. Di un manera inesplicable. Anto sin spera.

Den curso di tempo e no por a ripara nada. Tur cos tabata muestra normal. Nada tabata muestra cu Carmen tabata totando un plan asina baho. Un plan asina diabolico. Y mientas e tabata pensa tur esaki radio tabata sigui pari noticianan cu no tabata port'e nada.

Ki tabata port'e, Caamaño, Bosch, Porto Rico, Santo Domingo, Vietcong y tur e hala di noticia cu radio tabata scupi na e momentonan ei.